

THE UNIVERSITY OF CHICAGO

CHICAGO, ILL.

欽定平定雲南回匪方略卷二十五 乙丑年 中央民族學院圖書館藏

二月二十八日 甲午 駱秉章奏言 臣前後兩次准

林鴻年移咨摺稿其前次摺內有若不先靖黔
匪則辦滇必多牽掣等語深切時事其第二次
摺內所奏迤西亟須勦辦請先籌餉銀數萬兩
挑募川邊壯勇並令唐友耕劉嶽昭與胡中和
易地防剿或抽撥劉鶴齡江忠淑二員得力可

靠之軍助滇等語竊查劉鶴齡江忠淑兩軍現
攻階州踞逆正值喫緊唐友耕所部分扼昭劍
以防賊竄均難抽調卽劉嶽昭果後軍分布川
東南千餘里皆與黔邊毗連羣寇環伺乘閒突
擾幾於無日不分兵截剿緣黔省徧地糜爛田
無可耕民不得食相率爲盜無不垂涎川疆希
圖飽掠若遽抽調劉嶽昭之軍進規雲南川界

一處疏防黔省數十萬飢驅之寇勢將闌入川
境蹂躪腹地是滇省尙未得手川疆先受其禍
且征滇之師由川籌餉儻劉嶽昭之軍進至昭
通而黔寇擾至川境截其後路餉不能運滇事
更難爲力蓋杜汶秀踰伏大理一隅僅圖自固
馬復初馬如龍等首鼠兩端尙未敢顯露叛迹
非比黔省之連城告陷半爲賊踞寇氛肆擾民

不聊生以大局緩急情形而論川省仰藉

天威如能速將階州之賊盪平北防稍鬆亟宜酌調各

軍會合劉嶽昭所部一由秀山進規思南一由

涪綦救援遵義一由敘永直擣大定先紓黔省

之患黔事既定聲威並壯劉嶽昭一軍卽可由

宣威以趨曲靖唐友耕所部出敘南以至昭通

互爲聲援爾時再由雲南督

臣撫

臣責令岑毓

英馬如龍使效前驅以攻杜逆自明心迹有功
則賞不用命則戮俾知予奪出自

朝廷操縱皆由大吏則紀綱法度釐然改觀然後鼓

行而前以規大理

臣

俟階州踞逆殄除卽先調

建昌鎮周達武一軍馳赴會理以遏杜逆竄川
之路迤西可望廓清矣此時黔事方棘川防未
鬆僅接楊盛宗稟報已將馬榮擒獲並未見其

解川解黔雖聞已在雲南省城正法虛實未敢
遽信據臣所聞則馬如龍不攻杜逆轉與臨安

梁士美爲敵是馬如龍等心懷叵測撫臣林鴻

年旣無重兵萬不可輕進以蹈危機徒損威重

若如林鴻年所請先撥餉銀數萬兩自募練勇

且引陝省餉項以爲較量殊不知上年劉蓉往

援漢南所有湘果諸軍皆係川省派往餉項仍

由川省發給是以始有每月八萬之議劉蓉所帶十餘萬兩悉發各軍欠餉並非協濟陝省另有此鉅款也卽每月八萬之餉亦至上年四月截止嗣因臣調湘果兩軍暨彝字營攻勦階州之賊是以該營月餉仍由川省撥解將來唐友耕劉嶽昭進兵雲南兩軍統計萬餘人月餉所需六七萬兩亦由川省撥給仍與陝省事同一

律林鴻年現在並未擇有統帶營官及哨長百
長等員弁卽使招勇何以成軍況川滇邊界游
勇最多易聚難散後患更不勝防從前雲南之
何有保林自清賽德等皆擁練數千未見勦平
回逆而塗毒官民流禍甚烈卽李永和竄擾川
省亦雲南之散練也詎可輕言招募臣前在湘
南援江援鄂援粵援黔曾未稍分畛域何獨於

蜀徒爲畫疆自守之謀蓋川省楚軍祇有此數
旣難遠道增募而南北防勦未嘗稍鬆臣謬荷
聖恩畀任封圻自不得不以川疆爲重必先保全川省
完善之區然後可以越勦鄰氛若慮人指摘不
度緩急以力所不能及者輕於一試儻鄰患未
紓本省復被賊擾不惟上負

朝廷委任且無以下對蜀民此用兵次第仍宜先黔

後滇方克於事有濟之實在情形也奏入得

旨前因勞崇光奏迤東肅清諭令勞崇光林鴻年進駐
東昭並令該督抽撥唐友耕劉嶽昭等所部數營迅
籌餉銀交林鴻年帶往據奏各情仍著該督酌量緩
急辦理所稱雲南散練及川邊游勇未可招募著咨
會林鴻年卽行停止

上命議政王軍機大臣傳諭駱秉章勞崇光林鴻年曰

滇省軍務不宜再緩現在迤東渠魁授首官兵正宜
乘此機會專攻迤西回目楊振鵬擅攻臨安馬如龍
等權勢日張亦宜分別勦辦裁抑林鴻年自宜速集
兵勇進紮昭通籌辦軍務以資控制並著駱秉章遵
照前奉諭旨於劉嶽昭唐友耕等所部酌量抽撥數
營交林鴻年帶往滇省所需餉銀亦由駱秉章酌量
緩急撥解以顧大局唐友耕俟階州克復後卽著駱

秉章飭令該提督統率所部移赴滇省林鴻年所請東征局每月撥銀三萬兩本日已諭令官文等酌量情形籌濟矣前經諭令勞崇光由黔赴滇著卽懷遵前旨迅往迤東擇要駐紮與林鴻年會商軍務相機辦理毋得遷延觀望致誤戎機

上又命議政王軍機大臣傳諭官文曾國藩吳昌壽李瀚章曰昨因楊岳斌奏甘省餉需浩繁請將東征局

改爲西征局藉資接濟當經諭令官文等斟酌妥辦
此時滇中軍務未平紀綱廢弛非有督撫大員帶兵
入滇相機勦撫不足挽回全局林鴻年現擬進紮昭
東保全完善以期節節前進第餉項支絀憲後跋前
仍恐於事無益官文曾國藩等素顧大局務當與吳
昌壽李瀚章等各就本省情形於撥解西征餉銀外
每月可以協解滇餉若干酌定數目迅速奏明辦理

一面知照林鴻年源源解濟不得推諉不行亦不得
遲延不解致誤要需滇省地極險遠逆匪臨張若非
鉅餉贍軍必至中途坐困該督撫等務當同心協力
共襄此舉俾得戡定邊隅出斯民於水火是爲至要

四月初八日

壬申

林鴻年奏言

臣

疊次遵

旨與駱秉章函商一切該督臣仍執前說唐友耕一軍

終難騰出助餉一層亦無可望顧臣之所以必

求助於川者大端有二一須設立親兵一須羈
維滇弁查張亮基督辦滇省軍務由湖南帶有
親兵賈洪詔由湖北來川沿途募有襄宜勇丁
卽如駱秉章來川督辦湘果諸軍之外帶有湖
南巡撫親兵以川省完善之區總督標兵之衆
尙須另爲準備況滇境直同虎穴更宜思患豫
防劉嶽昭本屬四川總督翼長及補滇臬仍領